

## REGIONAL NEWS

HEADLINES:-

1. Food Corporation of India chuan furpui laia mipuite phang lova awmna turin buhfai thahnem tak Mizoramah chhekkhawl a ni a ti.
2. UD&PA Minister Pu K. Sapdanga chuan Lunglei Municipal Council - in Lunglei mipuite tan hna a thawnna tur kawng an sial chho mek a ti.
3. Prime Minister Narendra Modia leh President Droupadi Murmu-i te chuan vawiin khan Odisha-ah hmasawna project cheng vaibelchhe 46,600 hu an hawng.
4. Sawrkar laipui chuan damdawi chi khat aia tam tihpawlha siam thin fixed-dose combination (FDC) damdawi chi 16 chu siamchhuah leh hralh a khap .

&lt;&gt;&lt;&gt;&lt;&gt;

FCI STOCK

Food Corporation of India chuan Mizorama ei leh bar lo luh dan nitin a thlithlai reng a, mipuiten eitur tha an ei theih nan a chhekkhawl na te pawh a tha thei ang berin a enkawl mek tih a sawi.

Hemi chungchanga thuchhuah ah chuan Mizoram chhunga FCI kudam hrang hrangah June thla thleng hian Buhfai leh Wheat- stock awm zat chu MT 24,858 ; Buhfai - MT 23,862 leh Wheat - MT 996 a ni.

Kan corr report ngaithla ang.

Furpui vanglaia mipuiin ei tur an tlakchhawm loh nan leh stock a awm reng theih nan, Mizoram lamah rail hmangin Buhfai leh wheat rawn phurh mek a ni tih FCI chuan a sawi a. Hei hi Bairabi railhead leh Sairang railhead kaltlangin a lo thleng thin tih an sawi a ni.

Tun hnaiah hian rail hmangin June leh July chhunga buhfai lo kal tur leh kal mek zat hi MT 20,032 a ni a. Tun dinhmuna stock awm zat hi a thahnem tawk hle a, MT 24,858 stock hian National Food Security Act leh welfare scheme dangte Mizoram pum mamawh thla 4 vel chhung daih thei tura ngaih a ni. Thla tin atana NFSA leh welfare scheme mamawh zat chu: Buhfai - MT 6,209 Wheat - MT 123 a ni a. Stock awm mek leh ruahman sa lo kal turte hi safety buffer norm aiin an thahnem zawk ni a sawi a ni bawk.

FCI chuan Mizoram Sawrkar tan mamawh aia tam mah pe thei turin Open Market Sale Scheme - Domestic hnuaiah e-auction tel lovin Buhfai a pe a, hei bakah hian, June thla atan Buhfai MT 3,000 chu sem tura ruahman ni tawhin chu mi tihlawhtling tur chuan rail rake dang MT 2,600 pawh chah belh tum a ni an ti.

&lt;&gt;&lt;&gt;&lt;&gt;

## NH

Kolasib District chhunga National Highway NH 306 & 06 Diakkawn atanga Vairengte lam leh Khamrang lam kawngte thawmthat leh siamthat hna Joint Inspection vawiin khan Kolasib Additional Deputy Commissioner Pi B Malsawmtluangi hovin neih a ni a,

Tun dinhmunah Kawngpui hi a tlangpui thuin lirthei tlan nuam tawk tura siam a ni tawh hlawm a. Amaherawhchu, hmun engemaw zatah tlan harsa khawpa chhe zual lai a la awm bawk a. Hemi chungchangah hian kawng siamtu NHIDCL hotute chuan report pein, kawng chhe zual bikte hi tui put vang leh a hmun leilungin a zawh loh vang hrim hrima chhe hma bik a nih thu an sawi a. Heng hmun chhe zual tak takte hi concrete pavement tura rawtna pawh thehluh a nih tawh thu an tarlang .

Addl. DC chuan kawng siamtute chu theihtawp chhuaha hma la zel turin a chah a. Khualzin leh lirthei tlante himna leh awlsam nan kawng chhe zualpui laite chu endika chhinchhiah zung zung a, a rang thei ang bera thawmthat hna thawk thuai thin turin a ngen a ni. Mipui mimir ten harsatna lian tham an tawh loh nan hmalak zung zung a pawimawh thu a sawi bawk.

<><><>

## UD&PA MINISTER

Urban Development & Poverty Alleviation (UD&PA) Minister Pu K. Sapdanga chuan Lunglei Municipal Council (LMC)-in Lunglei mipuite tana hna a thawhna kawngah hun rei tak hna thawk hlei thei lova a awm hnuah hmalakna lawmawm tak an nei thei dawn tih a sawi.

Lunglei Circuit House Conference Hall-ah Lungleia thu thar theh darhtu te kawmin Pu K. Sapdanga chuan Lunglei khawpui tana UD&PA-in a ruahman hmasawna project lian zual tar langin, State Priority Project (SPP) hnuaiah cheng nuai 1,750 hu project lian 5 kalpui mek a nih thu a sawi a. Cheng nuai 400 senga Sazaikawna LMC Complex dinna turah ram lei tura biak fel tawh a man pe hlei thei lova kum hnih a awm hnuah tunah ram leina tur sum funa an thawh pheih thu leh vawiinah inhlan a nih tur thu sawiin, ram man an pe tla thei ta chu lawmawm an tih thu a sawi a. LMC Complex sa tur hian contractor thlan fel a nih tawh thu leh hna an ñan nghal theih dawn thu a sawi.

Minister chuan SPP hnuaiah hian cheng nuai 350 senga lirthei lian leh te din khawmna tur Transport Hub sakna turin Theiriatah mimal ram lei a nih thu leh a man pek tlakna tur tunah an rawn fun pheih thu sawiin, contractor thlan fel tawh a nih thu leh a rem veleh an bun ñan theih dawn thu a sawi a. Cheng nuai 200 senga Ramthar AOC Market Shed sakna tur pawh buaipui mek a nih thu sawiin, cheng nuai 300 senga C. Thuamluaia Mual bula lirthei dahna Multi-Level Car Parking sak hna chu contractor-te'n an thawh mawp mawp tawh thu leh a hmun an laih zawh lek lek tawh thu a sawi a ni. Saikuti Hall chei ñatna turin cheng nuai 500 dah a nih thu a sawi bawk.

Minister chuan Urban Infrastructure Development Fund (UIDF 2025-2026) hnuaiah Lunglei khawpui tan cheng nuai 525 dah a nih thu sawiin, Lunglei Park chei ñat nan cheng nuai 200 dah a nih thu leh khaw ñat veleh contractor-te'n hna an ñan nghal tur thu a sawi a. Khawlaia vantlang inthiarna in (pay and use toilet) set 1 cheng nuai 25 zelin hmun 4-ah cheng nuai 100 senga siam tura ruahman a nih thu leh bul ñan theih thuai beisei a nih thu sawi bawkin, khawpui chhunga kea kalte veivahna

footpath chei that nan cheng nuai 225 dah a nih thu leh khuain a zir chuan thawh tan theih thuai beisei a nih thu a sawi.

Minister chuan SASCI hnuaiah Lunglei khawpui chung hmasawna hna hrang hrang 80 thawhna tur cheng nuai 200 dah a nih thu sawiin, Municipal te enkawl chhonzawm tur a nih thu a sawi a. Councillor-te'n an ward theuhva thawh dan tur an siam fel tawh thu leh hna tan theih thuai beisei a nih thu a sawi bawk.

<><><>

## YOGA

Department of AYUSH-a Yoga Coordinator Dr. Reuben Lalthanzuala chuan mihring dam hun chung rei telh telhah kum upa te tan Yoga a tangkai zel dawn thu a sawi.

Akashvani News in a kawmnaah he thu hi sawiin Dr. Reuben Lalthanzuala chuan mithiamte tarlan angin mihring dam hun chung chu a rei hret hret tih a sawi a. Hetiang a nih chuan kum upa an la tam dawn tih a sawi a. Kum a upat ruala mahni inrintawkna neia mahni taksa zo taka awm theihna tur chuan insawizawi a pawimawh tih a sawi a. Mipuite chu an thatlai atanga insawizawi dan leh rilru thunun dan hrang hrang chu Yoga hmanga zira Yoga ti thin turin a chah a. Natna neih hnua in enkawl leh chu a buaithlak avangin natna neih hmaa inpuahchah lawk a pawimawh thu a sawi a ni.

Kan corr report ngaithla ang,

*International Yoga Day hi naktukah khawvel pum huapin hman a ni dawn a. Kumin hi a kum 12 na niin thupuih Yoga, hrisel taka upat lam pan nan tih Yoga for Healthy Ageing tih chu hman a ni dawn a. Ramchhungah chuan Ministry of Culture huaihawtin a ram chung hmun hrang hrang 100-ah hman a ni dawn a. President Droupadi Murmu chuan International Yoga Day programme, Jabalpur, Madhya Pradesh-a hman turah khuallian a ni ang.*

*Akashvani News in a kawmnaah Union Minister of State (Independent Charge) Ministry of Ayush, Pratap Rao Jadhav chuan Yoga chu a naupang ber atanga a upa ber thleng huapzo turin sorkar in kawng hrang hrangin hma a la tih a sawi a. Nitina rim taka hnathawk thin te hman tangkai tur Y Break app pawh sorkarin a tlangzarh thu a sawi a ni.*

*Aizawlah chuan Health Dept hnuaia National Ayush Mission huaihawtin zing dar 6 ah Zokhawsanga 34 Assam Rifles Helipad ah hman a ni dawn a, Larsap Gen (Retd) VK Sharma leh Health Minister Pi Lalrinpuii te hovin hman a ni ang.*

<><><>

## HORTI FAIR

Tunkar Nilaini atanga vawiin thlenga Horticulture Fair vawi 13-na Aizawl Lammuala huaihawtah nimin thleng khan cheng nuai 60 man chuang thil hralhchhuah tawh a ni.

Akashvani News in a hmuna duty Horticulture department hotute a kawmnaah he thu hi department hotute chuan sawiin department hotute chuan mipuiten an fair huaihawt mek chu an hlut thu leh tlawhtu mipui pawh an tam thin thu an sawi a. Fair hawn ni, Nilaini khan cheng nuai sawmpali, sing ruk, sang li, zasarih sawmthum man hralhchhuah a ni a, a ni hnihna Ningani khan an inhralhna hi cheng nuai sawmhni,

sing thum, sang riat, zasarih leh cheng sawm a tling leh a. Nimin, a ni thumnaah khan cheng nuai sawmhni panga, sing hnih, sang li, zariat sawmli man an hralh leh a. A vaia belkhawmin nimin thleng khan cheng nuai sawmruk, sing hnih, sang sarih, zasarih sawmriat man an hralh tawh a nih thu an sawi a. Vawiin bika hralhchhuah zat chu report an la dawng khawm mek tih an sawi baw a ni.

Kan corr report ngaithla ang.

*Vawiin khan Aizawl Lammuala Horticulture Fair kan tlawhnaa dawr hawng ve Pi Zothanpari chuan kum 2026 Horti Fair chu a hman tangkai thu sawiin anmahni thlai thar ngei an zuar a ti a. Kumin anga mi an tam a la hriat loh thu sawiin sorkar hmalakna chu lawmawm a tih thu a sawi a, a huaihawttu ten ruahmanna an siam tha a tih thu a sawi a ni.*

*Zemabawk Piggery Society te pawhin vawk pul hri leh AMC inkhuahkhirhna avangin vawk an vulh hleihtheih loh hnuah Vahdhan Vikas Kendra atangin chhawmdawlina dawngin aieng, hmarcha hmui te siamin Horticulture Fair-ah an phochhuah ve baw a, an society tan fair chu tangkai an tih thu an sawi a ni.*

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### PM

Prime Minister Narendra Modia leh President Droupadi Murmu-i te chuan vawiin khan Odisha-ah hmasawna project cheng vaibelchhe 46,600 hu an hawng. Vawiina project an hawn zingah hian energy, transport, industry tihchangtlunna tur hmasawna ruhrel, healthcare, education, irrigation leh tui thianghlim hnianghnarna tur hnathawhte a tel. Pu Modia hian vawiin vek khkan Mayubhanj district-a Pahadpur khuaa Santhali Jahera, Goshani Peeth leh Ho Jahera hmun thianghlimah te a tawngtai a. Heng hmunahte hian President Droupadi Murmu-i chuan a tawiawm a. Henglai chhehvela tlangmi tribalte kutchhuak leh hnam ziarang hrang hrang a nekul baw a ni.

<><><>

#### FDC

Sawrkar laipui chuan damdawi chi khat aia tam tihpawlha siam fixed-dose combination (FDC) damdawi chi 16 chu siamchhuah leh hralh a khap. Supreme Court thupeka Drugs Technical Advisory Board-in mithiam thlankhawm committee a din chuan heng damdawiiah te hian mihring tana hlauhawm thil awm tih an hmuchhuak a. Heng damdawi khap zingah hian vun lam enkawlina damdawite, nachhawka, tha na damdawi leh antibiotic te an tel a ni.

Union Health Minsitry chuan damdawi him leh tha a taka finfiah ngei pekchhuah anih theih nan hetiang hian hmalak a ni a ti a. Tuna khapna siamte hi State tin thuneitute chu khauh taka kengkawg turin a chah a ni